



聖宋名賢五百家播芳大全文粹卷三十一

謝表

池州到任謝表

王龜齡



失職中司黜官小郡尚分符竹初見吏民咎大罰輕

感深涕隕

中謝

伏念臣起身寒苦涉學淺疎自甘窮

老於布韋孰謂冒榮於軒冕從越冗散親被簡知璧

水道山提携羣彥綸垣鎖闥接武近班皆席上待問

之珍非柱後惠文之用忽蒙宸筆俾總臺綱義不苟

辭輒奮虬螭之力志慙無勇亟聞膺隼之呼惟聖主
之難遭亦恃孤忠之可察封章上達遂忘白簡之猜
嫌負罪左遷猶得朱幡之賁飾函容厚矣報稱缺然
茲蓋伏遇 皇帝陛下湛恩厯洪垂聽寬裕執用賞
用刑之要權使功使過之宜是致孱庸未從遠斥臣
敢不布宣德意撫養編氓影落江湖踴躍自憐於去
國夢追鴛鴦區區常念於愛君必誓糜捐仰酬覆燾
臣無任

饒州到任謝表

王龜齡

得時遇主協五百歲之昌期共理分符叨二千石之
重寄試之民事簡在帝心伏念臣奮身諸生肄業太
學上皇親策擢居多士之先陛下誤知眷出群臣之
右方御天之十日畀近地之一麾旋蒙召還屢辱賜
對魏徵之蘊幾展盡賈誼之言畧施行曾未閱於三
時已徧更於數職遽從憲府擢貳天官人言遭際之
非常臣懼寵榮之過分力辭成命果獲俞音榮聯書

殿之名假守侯藩之近身獲全於進退恩不替於初
終况此楚東之故邦實為江左之奧壤顏真卿英風
如在范仲淹遺愛猶存臣實何人可預茲選茲蓋伏
遇 皇帝陛下法舜受禪體堯宅天廣收眾正而首
及滯淹樂聽讜言而不罪狂直遴選朝廷之士疇咨
岳牧之臣雖地分內外之殊而心蔑輕重之異知臣
本出乎白屋謂臣可牧夫細民札命下行憂分千里
臣敢不仰奉德意宏宣教條雖才非太公不能五月

服報政然忠猶杜甫未嘗一飯忘君

夔州到任謝表

王龜齡

地易夔門難敢辭於蜀道心傾堯日遠尤甚於長安
祇拜訓辭惟深感涕臣頃由御史出守鄱陽任甫及
於期年報茂聞於五月慕言言之烈於顏魯國學優
優之治於范仲淹擾切戒於庸人第務近民之易罪
或得於巨室方知為政之難比因有疾而丐祠不謂
誤恩而分閫况魚復素稱岩邑在坤維實為要衝苟

非文武之長才曷副蕃宣之重寄豈臣庸謬可稱使
令茲蓋伏遇 皇帝陛下德方日新仁若天覆憫烏
道烏蠻之險有刀耕火種之勞非善治不可以懷柔
謂微臣或勤於撫字錄其寸效畀以雄藩臣敢不究
疾苦於閭閻布教條於州郡觀武侯八陣居安未免
於憂邊誦社甫百篇不志不忘於愛主

湖州到任謝表

王龜齡

遠障承流之循良之善政近藩改命仰覆載之隆施

祇服訓詞彌增感涕伏念臣五年去國兩地分符饒
俗浩穰有難調之巨室夔疆瘠鹵介絕險之烏蠻但
思治己以先人豈忍奪民而生事故田里安其不擾
而獄訟由之稍稀敢曰懷歸實緣多病輒控詞庭之
請屢干旒宸之嚴寬斧鉞之重誅復畀股肱之佳郡
瞻清光於便殿展素蘊之忠言謂能恤民蒙天語之
見獎徙以自近佩聖恩其敢忘豈期衰遲有此遭際
茲蓋伏遇 皇帝陛下至仁兼被大智難名憐臣守

志弗欺共理猶知於惠養臣憫奉躬匪懈事君或盡
於勤勞故此異除華於朽質臣敢不持循憲度効法
京師訪靈沼於真卿深體好生之德恢儒宮於安定
益陶善教之風

泉州到任謝表

王龜齡

五年三郡蔑酬天覆之恩一札十行又拜春溫之詔
方奉祠而竊祿遽共理以分符隆睠不忘孤忠益勵
竊念臣少不學古晚方入官論事則意廣而才疎為

郡則心勞而政拙惟民是卹雖誤蒙金口之褒其毀
乃來終莫奪簧言之巧松菊方尋於三徑江湖復把
於一麾非神聖素察其衷豈臣下可得而薦辭避不
獲顛躋是憂况閩為負山帶海遐僻之鄉而衆乃富
商大賈往來之會詎容庸謬可備使令茲蓋伏遇
皇帝陛下堯仁宅天舜智察物知臣無剝下益上之
罪恕臣有抑強扶弱之偏悟即墨之浮言畀清源之
善地臣敢不清白奉己循良牧民富而可求第守不

貪之寶老之將至尚懷有犯之忠

恭州到任謝表

謝深甫

濫分支郡之符才難守地獲上先臣之冢恩實自天
荷大德之曲成拊孤蹤而增感臣中謝伏念臣曩緣
餘澤得被寵光粗知寅畏於簡書惟守相傳之忠孝
暨臨劇邑尤愧罔功豈期合牧岳之言誤以玷冕旒
之聽忽奉詔俞之寵過膺堂察之榮從閩越之一同
陞清源之半刺載惟先世往值中興憤醜類之干常

仗忠謀而致命天厭亂事適無成功時方急於和戎
義不辱於從虜逃生彌歲羈死遠方雖松楸之念常
切望雲而擣櫟之材敢言擇地屬外補之有請霈中
命以疏榮改畀渝邦付以承流之寄前通蜀道便於
展墓之私寅緣獲對於清光掖厯冒陳於往迹動玉
音之慨嘆辱天語之褒揚極泉壤以生輝罄髮膚而
曷報茲蓋伏遇 皇帝陛下恢張治具激勵臣工天
地雖大而仁及纖茲日月至明而光極蔀隙謂敬其

父而子必悅惟教以孝則忠可求故遂其掃域之心
欲示以匪躬之効臣敢不仰酬洪造誓竭寸誠資於
事君已備知於德意堅於報國期不墜於家聲

青州到任謝表

崔正言

領郡遐方靡聞治効分符善地復自恩除揣分難安
撫襟甚愧臣中謝伏念臣低徊末路黽勉眾流欲扶
先闕於既衰誓畢微躬而自効宿舂重趼僅廢半生
陸駕川浮幾環萬里然連翩弱羽撲椒下材志慮冥

頑動輒迷方學術迂疎則終然味道雖負移山之志
迄無橫草之功止緣幸遇於熙宸遂獲猥霑於仕版
宜從簡汰以警孱庸而戴德自天濫官有土過鄉上
冢紆組綬以誇榮退食娛親戲綵衣而甚寵此蓋伏
遇 皇帝陛下需雲敷蔭蕭露布仁肆紹續于丕圖
赫闡揚於前列恢兩儀之度無不生成眷一介之微
皆歸器使故如臣之苟賤亦未斥於曠閑付以詔條
寄之民社臣謹當掛魚厲操置水清心祇慎國章詳

求民瘼蒲鞭不犯敢追配於前蹤襦袴興謠期復見
於今日

婺州到任謝表

入塵法從歲躔悅閱于再周出假便蕃道路僅更于
數舍仰體曲成之眷敬宣寬大之恩伏念臣知力不
能踰人學術無以異眾才疎意拙少嘗粗志于功名
心折氣摧晚實重傷于憂患豈謂衰頹之朽質寔蒙
特達之聖知始寓直于掖垣旋參華于選部文惟骯

骯屢承褒袞之加議本戇愚悉荷威顏之假感洪慈
之未報揣微分而敢安顧此東陽今為輔郡財殫粟
匱適遭饑饉之餘訟劇政繁尤重蕃宣之委孰云孱
懦可副選掄此蓋恭遇 皇帝陛下躬慈儉以保邦
體寬仁而御下謂臣早更州縣或知撫字之方憐臣
久侍禁嚴備識憂勤之意責之列職寵以分符敢效
昔賢樽俎但期于賦詠庶幾漢吏里閭遂稍于奠安

再知婺州到任謝表

韓无咎

冠西清之美職已冒殊恩分太末之名邦仍叨舊治
稍違行闕即屈部封伏念臣少嘗竊慕于古人晚始
親逢于聖主豈謂迂疎之質遂蒙特達之知造滕而
貢狂愚既屢嘉其一德披肝而導志慮曾何補于萬
分罔知歲月之遷寔荷寵靈之異昨膺召節誤長從
班孰云銓叙之平益愧論思之謬葵藿徒知向日忍
負寸心犬馬猶有戀軒敢懷去意第每虞于譏議仍
滋懼于滿盈自詭為州寔惟報上况滋寶婺特近大

地竊重臨治行靡追于黃霸時容著詠郊居肯慕于
沈侯祇脩眷私若為稱塞此蓋恭遇 皇帝陛下德
參天地道冒華戎泰和在於唐虞肅臣工而器使仁
風惻於黎庶擇守令以布宣施及妄庸荐加優渥臣
敢不恪求民瘼寅奉藩條官聯喉舌之司顧敢忘于
左右郡亦股肱之寄誓益告于謀猷

建寧府到任謝表

韓无咎

憑懇籲天莫遂請閒之願疏恩易地仍叨共理之榮

優假至深凌兢罔措伏念臣奮身疎遠遭世盛明入
參侍從之華每蒙異眷出領藩宣之寄曾乏微庸况
歲月之僅周積過愆而靡遑孤蹤易毀寔控閩陬代
憂全度兼容特畀潛藩之重眷茲建水寔控閩陬代
藉初基覺谿山之改觀官游寢老慨民社之嘗臨雖
馳驅頗愧於壯年然委付有光前日此蓋恭遇 皇
帝陛下惠綏羣獻明燭高微器使人材舉絕重輕之
弊衡持天下悉無內外之殊不遺管蒯之微尚費乾

坤之造軫其迂純錫以便安臣敢不仰體曲成益思
盡瘁土風末俗猶粗識其二三利澤深仁或布宣于
萬一

靜江府到任謝表

代施資政

韓无咎

擢從祠館就領帥符恩許自新顧馳馳之敢後榮踰
始望徒跼踖以靡遑已見吏民具宣詔旨伏念臣性
資凡陋術業空疎比叨預于政機迄無裨于國論老
將耄及寔逃負乘之機福過災生積有素餐之戾曲

荷乾坤之造尚寬鈇鉞之威竊食投閒慨驚魂之未
定銜恩起廢悅神觀俱以還惟茲八桂之封外控百
蠻之壤奉琛面內廟謀方事于綏懷剖竹臨邊聞寄
益資于鎮撫豈翳衰鈍可副使令茲蓋恭遇 皇帝
陛下大度兼容至明洞照任賢而福天下邁成湯選
眾之仁進德以尊朝廷迪虞舜知人之哲洪啟同寅
之治聿求共理之良臣敢不仰體眷慈誓殫綿力雖
聽風觀化未能追循吏之規而省事清心亦足示遠

人之意

蘄州到任謝表

葉正則

始從參幕無最可書驟借專城以恩被錄對寵靈而
甚願誤寄委以知難中謝伏念臣頃隸太常承乏博
士方壽皇襲行舜禹之舊當陛下祇見祖宗之初頗
預計論嘗叨奉引何幸清明之上獲綴末班乃緣貧
悴之餘自求外補遠役忽棲於故楚浮家幾遍於長
川恭惟駕馭豪傑之時兼有收挽孤寒之道遂令試

郡課以治民江黃之間山澤相雜素號僻在本極貧
虛屬因淮南行鐵以來暨乎斬口置監而後陰仰官
鑪之羨不勝偽治之煩浸用驕奢無復繩矩所以檢
覈增鑄禁絕私錢畏兩文銷折之多市井至於晝閉
取十年工本之數軍庫為之頓空解紛既難任責良
重將欲布宣國家拊循之德奉行監司督察之威稍
安人情粗給經費懼非孱拙所克堪勝茲蓋伏遇
皇帝陛下詳於使臣察於知遠簡擢疎賤即為守望

之親磨勘鈍頑收其敏達之効輯和邊面培壯本根
臣敢不因時所宜以靜為福日計不足雖無毫髮之
功心力未窮尚答乾坤之造

建康到任謝表

葉正則

內參從橐之華外付帥垣之重蓋人以為寵而臣之
所憂中謝伏以行宮蒙高宗臨御之頻建業為六朝
都邑之舊感時惟遠撫事尚存義執仇讐安得不居
今而思古慮先根本則豈容忘實而徇名藩墻初銳

于掃除堂奧遽煩于脩警江流迴繞遂將數里而屯
民力空殫必也計丁而役募市人至萬數閱水艦且
千餘欲以歲年之規責于旬月之近自憐憂患復苦
病昏忽被趣行罔知攸措此蓋伏遇 皇帝陛下文
訓武克天施地生觀衣衲襦曳之文所直戒懼誦桑
土綢繆之句尤在恩勤臣敢不怵惕以預防拊循而
夙具視身衰謝已無欲速之心憑國威靈願附不爭
之勝

到任謝表 代陳左相

林少穎

二年輔政顧何補於聖朝累表陳情遽竊於分閫寄
班詔條而夙駕遡里閉以晝游恩大難酌愧深無措
中謝伏念臣頃叨躡用居乏顯榮豈惟朝綱國體之
莫隆抑亦時材人望之非稱愒日玩歲初無久大之
謀筭効計未有纖微之報茲負乘之為累惟折覆之
是憂乃漉悃誠固祈罷免敢圖洪造曲賜包荒畧其
既往之愆錫以非望之福既蒙善去且獲榮歸畀便

殿之隆名撫全閩之巨壤此蓋伏遇 皇帝陛下至
誠樂與善始善終一視同仁成小成大以臣八郡人
物之舊必也周察于民情謂臣兩地臣鄰之聯或能
布宣于聖德特沛風雷之號使均雨露之恩臣敢不
周爰咨詢克勤無怠雖身在江湖之外實戴堯天然
威存咫尺之間常瞻舜日

到任謝表

葉少蘊

分東道之封圻再臨江國守北門之管鑰密護祥居

任非所堪辭不獲命臣某 中謝 伏念臣去違軒陛俯

仰十年退伏丘園棲遲一壑念多壘尚艱則懷捐軀

盡瘁之義思大恩未報則有畢命靡他之言敢擇所

安自求遠屏謂年齡之浸晚迫疾恙之交攻惟聖主

曲亮此心故愚臣得安其分豈期人之復誤詔除力

殫懇款之誠莫動高明之聽勉交印綬寔愧吏民茲

蓋伏遇 皇帝陛下惠顧臣鄰憂勤土宇撫萬邦巡

候旬何止臨踐土之宮會諸侯選車徒是將復東都

之業責其來效付以舊邦斗運天旋已振荆吳之勝
氣風驅電掃行銷阿岱之妖氛但臣陳力不能強顏
何補欽承成旨暫假歲時疆場無虞儻苟逃於譴累
冕旒甚適尚終冀於慈憐

北京再謝任表

韓魏王

臣某言昨蒙聖慈差降中使齎賜勅告改授永興軍
節度使判大名府再任尋累上章乞免換節制之命
伏奉詔恩特允所乞仍別降敕再任者悃幅屢陳從

欲許還于新節衰疲自力竭能勉撫於舊封委寄逾

深顛濟是懼臣某

中謝

伏念臣本緣一介之曲學歷

被三朝之誤知自解宰鈞繼紆守紱早年遇事風霜
不計於殘軀晚歲纏疴藥餌乃同於常饕比引揣躬
之分數裁辭劇之章力丐閑州少安病質而恩生望
外事與願違俄更西雍之帥旄尚付北門之留鑰所
以極論去就仰黷聰明幸寵利非事君之宜必冀寢
加恩之命策疲駑雖老臣可強敢不拜再任之休訖

奉俞音兩諧愚懇此蓋伏遇 皇帝陛下至仁天冒
盛德海涵器使庶工愛徧舊物雖俊傑甚眾並試有
為之時而疋瘁之餘惜投無用之地敢不勤宣條教
兼拊兵民倘溝壑之未填尚乾坤之可報臣無任云
云

謝再任表

三載黜幽方懼干于明憲再命而偃忽薦被于異恩
不稱所蒙重慙非據臣某 中謝伏念臣蚤由疏賤誤

竊寵榮先朝濫寘于從班本無報効陛下擢登于正
路已迫衰殘自知陳力之無堪唯有乞身而引退逮
謀帥閫仍玷留都故連年雖幸于苟安而無歲不期
于罷免仰蒙全貸偶及終更惟鼯鼠五技之既窮亦
駑馬十駕之何及豈期過聽更責後圖茲蓋伏遇
皇帝陛下體貌群工作興庶政念其拳拳忠款初非
有愛於餘生察其齷齪廉勤猶未遽懼于大過姑令
代匱豈曰因能丁寔殆至于再三感勵難酬于萬一

臣敢不欽承德意勉激愚衷苟子產見推晚或容于
鄭俗雖廉頗已老終無憾於趙人

謝功賞轉官表

宋子京

祕錄終篇鴻都第賞例霑微數垂料餘勤授受交虛
榮憂兩瘁中謝竊以廣內之奧中經所藏自四聖相
承凡七紀而遠積丘山而盡在糝朱紫以未分金匱
深嚴牙簽叢舛攸司傳失有詔部分疇簡名才總製
都目體漢室之流略槩見所從參史氏之藝文種分

必類討論既定統紀悉周而僚輔他遷纂修交集臣
猥緣懵學俛與末行素自憊冥動咨典領雖片文殘
牒時竄左文且雜語諸家尚悉前載訖慙戮職中請
為邦遂專刀筆之煩益忘緹油之習不謂芸編卒業
黼幄程文嘉衆籍之有條美諸儒之兢力因褒邇列
施及孤臣汎文散之近階賜朝勲之優轉揆榮至渥
撫已無堪閣筆居多早戢鍾繇之恨殺青偕上敢叨
劉向之功汗渙不收天高難訴但能銘於肝膈或論

報於涓埃愚款不誣

謝功賞轉官表

邵公濟

初約信書首預編摩之列載陳奏冊例叨進擬之恩
感宸意之未忘覺衰淚之霑落中謝恭惟皇帝陛
下道隆前緒業茂中興當故都金匱石室之藏已空
致先朝壘功緯績之實不顯孰及闕文之史殆同補
亡之詩爰修掌故之官少緩武步之事屢興當亡之
嘆思慰在天之靈慎選通儒專功上宰君子之能事

既畢矣聖人之大孝何加焉臣方階俗吏以鴈行嘗
備太史之馬走聖經絕筆冒居游夏之無辭大典成
編益嘆文武之善繼

謝八寶赫轉官表代

晁之道

享帝洪休受天大寶歡騰海宇慶浹臣工均載寵榮
獨慚冒昧中謝竊以聖德昭格天心眷懷必有甚異
之珍符以永無疆之大厯顯錫玉粲備舉上儀於昭
列聖之光大脩一王之制肆班非常之惠澤用侈不

世之休祥如臣冥頑荷國寵渥前叨優叙令理恩遷
自矜流落之餘併切便蕃之幸此蓋伏遇 皇帝陛
下堯仁舜孝湯智禹功集此大成施於庶政神靈昭
答符瑞駢臻實萬世無窮之休俾羣臣並受其福遂
容孤蹇預切恩私宣化罔功寵或疑於加秩逢辰至
幸報敢憚於消軀

謝八寶赦轉官表

張成季

甫除罪籍遽進文階望遠雲天特預一時之澤光生

簪紱如非前日之身寵至若驚感深成涕 中謝 伏念

臣材猶社木性實絙人初非可用於時終有自貽之
悔間屬禮陳八寶慶洽萬邦赦其既往之愆開以從
新之路霜雪制物天將使之成材鞭朴御家父終無
於棄子矜憐舊物安養殘年復陪多士之步趨再奉
真祠之灑埽已踰望表仍玷序遷未聞圖報之一端
併沐流恩之三錫此蓋伏遇 皇帝陛下大道善貸
至仁無親凡百姓皆得其心靡一物不遂其性聖功

丕冒瑞應並臻嘉與庶工共承多福而臣偶緣緣幸
會濫服寵休遽蔭蒙璆既容可錄支離受粟尤愧無
功臣敢不誦明訓以刻肌披愚衷而指日倘萬分之
有補視九死以如歸

謝轉官表

汪彥章

小儒懵學安能及史之闕文聖主隆寬乃閱奏篇而
稱善頒陞遷之茂渥錄會萃之微勞顧誠何功辭不
獲命中謝臣伏以春秋之作法必始於編年書契以

來國豈容於無史自惜祖宗之相繼至今文獻之足
稽中更搶攘浸失銓次既憑筆削以傳後安可見聞
而異辭乃殫鉉槩之勤上瀆冕旒之邃由太初之後
而無錄雖幸纂成問祈昭之詩而不知固多脫略敢
圖抵牾遠辱褒嘉茲蓋伏遇 皇帝陛下垂意藝文
增光謨烈念兩朝之政事無一字於史官倘遠編摩
懼成放逸俯憐苦志屢遭尚白之譏爰進周行俾冒
殺青之賞臣敢不博詢耆舊追補散亡若書成果遂

於藏山度禮失不煩於求野

謝轉官表

施師點

奉清光於儲禁莫効微勞頌渙渥於慶霄猥承異數
辭不獲命愧豈勝情臣中謝伏念臣學術本迂智能
素乏自綴負於書監嘗兼侍於經帷更歷五年之間
前後四陞其職任莫專於端尹寵尤極於東察慚無
涓埃補報之功曲荷海岳包容之賜洎躋榮於二府
皆託蔭於重暉萬物雲從方快中天之覩長安日遠

亦霑零露之恩兩階優崇百拜祇懼茲蓋伏遇 皇
帝陛下緝熙聖學眷禮儒臣尚記初蹤曾叨於攀附
更憐晚節益厚於褒榮靜惟小器之易盈宜引遜章
而亟上寵頒鳳詔拊躬方切於兢慚祇佩鴻恩稟命
不勝於俯僂

謝轉官表

晁之道

勉營職業苟追譴訶忽綸綍之下頒驚寵靈之驟及
感深涕隕愧及汗顏中謝伏念臣蚤以散材屢更煩

使實人微而任重致力憊而憂深獨特保全久容尸
素究觀本末初乏涓埃敢虞過譽之言遂徹蓋高之
聽憫其盡力雖無可紀之勞能誓以捐軀粗有不侈
之忠朴超加顯秩曲責枯根服溫厚之訓詞佩光華
之新渥併為榮耀倍極兢慙此蓋伏遇 皇帝陛下
大德川流至仁天覆畢照萬方之遠集成庶事之康
謂勸使於官師必厚加於爵賞乃推誤寵以及罔功
負戴深恩彌覺丘山之重馳驅晚節自忘蒲柳之衰

倘補萬分竝辭九死

謝轉官表

蕭 燧

鶴禁侍言初乏一毫之益寵龍飛臨御遽叨兩秩之
遷弗獲固辭深慙虛受臣 中謝伏念臣學惟涉躐識
本迂疎頃濫預於政機每聳觀於參決遭逢特異榮
幸滋多運膺九五之當陽恩厚尋常之賜爵雖上聖
罔遺於故舊而微臣猥荷於眷憐蒙疊組之優崇顧
循墻而控避薦頒溫詔仰戴鴻私茲蓋伏遇 皇帝

陛下纂紹丕圖恢隆至治慶單無外矧依日月之光
澤潤有加不忘簪履之舊顧如衰晚亦被記存荷雨
露之沾濡實鄉閭之焜耀在江湖之上難補報於君
恩居畎畝之中第謳吟於聖德

謝轉官表

邵公濟

天邑鼎成申錫維新之命羈臣永廢亦叨念舊之恩
進秩有加出綸甚渥訓詞熟讀感涕無從臣中謝伏
念臣以坎窞百謫之餘在坤維萬里之外昨遇靖康

之初載誤蒙淵聖之深知偕前輩以同升非平生之
敢望擢從九列徑貳六卿屢對清光每陳迂論時城
下之師再黷而復退故河東之一麾而亟還豈期已
誓而復渝終作前和而後戰燕雲之首藉口而並入
并鎮之域轉盼而遂危直渡洪流大侵近甸朝廷不
能割土地以自保君父又欲守社稷而不遷罄竭孤
忠招攜同志亟函奏疏殿陛抗言荷聖主之優容憤
權臣之弗納厯考古人之禦寇罕聞王室之受圍捨

會戎避狄而不為徒堅壁清野而坐困甲冑躬擐雖
大慰於六軍矢石親臨本何煩於萬乘忽偏隅之自
潰蓋攻勢之難勝噬臍之悔何追逆耳之謀良驗網
羅八面涉歷三時穴以散居登而下瞰由金湯之失
守致鑿輅之在郊痛哭修門頗類喪家之狗偷生委
巷直同遊鼎之魚夫何誤國之謀見此嬰城之効逮
羣胡之旋邁邀二聖以遠征風雲至於慘悽日月為
之掩翳未容速死思究後圖乃於旬浹之間重起億

年之祚迎天王於代邸奉太母於東朝宗廟不移衣
冠如故惟神臯之卜宅實王氣之所儲臣偶忝居留
獲司版築興百堵之大役成千雉之舊規復還樓觀
之鬱葱盡滌溝池之羶穢而臣負罪被逐何勞可書
詎意皇明俯憐棄特物加褒賞用勸措紳此蓋伏遇
皇帝陛下念藝祖創業垂統之大功繼神皇設險
固國之遺志當百六之厄運獲九五之至尊巡狩有
方始示柔於強敵宅中圖大終浸福於羣黎臣敢不

仰戴鴻私益堅晚節方避賜環之寵敢言俟駕而行
疾病無堪卧巴江而死逼太平有日冀魏闕以生還

謝轉官表

張全真

紀十年塵腐之微勞申加訓諭增三品清華之峻秩
莫獲固辭登受以還懷慙罔措臣中謝伏念臣名浮
於實用過所長氣既衰而當戒得之時位已高而有
疾顛之懼居懷退抑祈免悔尤况律令三尺安出哉
率祖宗坦明之制所損益百世可也竇察吏纂脩之

勤自惟罔功何有於賞敢謂制祿之書來上策勲之
典遂行例辱進官之榮曲憐承乏之舊此蓋伏遇

皇帝陛下以上聖之質啟中興之圖孝通神明坐復
寧人之疆土恩被動植灼知臣下之勤勞既講信脩
睦以和諸戎故任賢使能以成其政効雖微而必錄
功益久而不忘致令不才切此非據匪言揚而事舉
已虞竊位之機顧政拙而心勞未識報恩之所

謝轉官表

汪彥章

投閑得請常懼空餐會課當遷復叨信賞誤大恩而
莫報持餘日以安歸中謝伏念臣去國九年奉祠兩
任生平戇直不隨世俗於雷同歲晚棲遲乃望君門
而雨絕孰云磨鈍之具亦及養疴之臣茲蓋伏遇
皇帝陛下揔攬權綱躬膺歷數宵衣旰食十年不廢
於憂勤寸地尺天一日悉歸於覆載冠帶百里賞刑
百工而臣投老江湖竢寘溝壑陪議論皂衣之後雖
愧名官奏絃歌清廟之初敢忘抒頌

謝轉官表

歐陽永叔

天地號令風雷鼓行一氣所均萬物咸被遂容僥倖
亦與褒升臣中謝伏念臣材不逮人識非慮遠徒有
事君之節未知報國之方冒寵貪榮已踰其量見利
臨得曾不知慚此蓋伏遇 皇帝陛下堯舜聰明禹
湯勤儉修前王之曠典述先志以繼成昭致精裡躬
臨路寢膺受上天之多福推與萬方而不私臣於此
時限以官守講儀制禮不預議郎博士之流助祭陪

祠不在諸侯萬物之列既乏一言之獻又無執事之勞徒隨翟閤共享餘賜普天率土難異眾以獨辭跼厚踏高但撫躬而無措

謝轉官回授表

汪彥章

邊捷上聞肆頒明賞政機無補輒冒殊恩超踰既極於周行褒寵更延於私屬仰承休命莫惜微躬中謝伏念臣初乏技能早膺掄擢雖玷機衡之末孰知帷幄之奇此興節制之師深入襟喉之地赫然成算斷

以淵衷靡逾旬歲之期坐褫種羗之氣乃示訓詞之寵兼收丞弼之勞惟帝念功宜考經綸之素如臣何力亦叨闕閱之榮茲蓋伏遇 皇帝陛下道本曲成仁無偏愛方舉策勲之典不忘克位之臣雖平時無橫草之功幸今日遇采薇之捷錫之茂渥同此膚功碌碌因人愧股肱之選懦拳拳許國誓肝腦之糜捐

謝轉官表

汪應辰

伏覩救命以臣知池州日守禦有勞特轉一官尋具

狀辭免蒙降詔不允者承流遵職恩寬罪戾之餘糾
眾擒姦責在封疆之守徒知竭盡敢覬褒嘉顧遜避
之莫從但兢慙而失措臣中謝伏念臣奮身寒苦遭
世休明推遷浸歷於華塗放逐尚分於小壘不虞群
盜倣擾鄰州終勤虎旅之來坐致湯池之固因人成
事碌碌無橫草之功忘戰必危赴赴有扞城之武逮
茲懋賞輒復露章仰靳曠蕩之恩均及偏裨之士詔
音開允輿論豔歆退自省循實為僥倖茲蓋伏遇

皇帝陛下示天下以大信得民心於至仁冠攘宜誅
盡掃荏蒲之聚膏澤所浸弗遺蕭艾之微矧是孤蹤
夙塵從列既佩循環之寵仍叨進秩之榮視若介鱗
猶能思於報効加之鞭策期必徇於靡捐

謝起軍轉官表

韓无咎

羽檄調兵僅供常職綸言錫命乃沐異恩悵懇避之
不俞第祇承而為愧伏念臣猥以頑冥之質誤蒙神
聖之知入侍禁塗豈有論思之効出分藩服曾何善

最之稱當周王田獵以選師仰漢帝璽書而賜郡元
戎十乘奉追召之既嚴次國二軍觀驅馳而敢後亦
妄陳于末議竊自獻于愚忠深懼譴訶詎宜褒陟披
肝瀝膽謂有願之必從縮頸汗顏迄無功而受賞此
蓋恭遇 皇帝陛下激昂士氣砥礪臣工陰闔陽開
務作新于庶政乾旋坤闢思底定于萬方致茲增秩
之榮靡間尸官之濫臣敢不欽承訓飭彌謹蕃宣躬
阡陌勸農桑布維新之令修車馬備器械庶觀復會

之期

聖宋名賢五百家播芳大全文粹三十一卷終

聖宋名賢五百家播芳大全文粹卷三十二

謝表

謝郊祀加恩表

宋公序

禮天拜胙甫畢于鴻儀括土均休汎霑于異數罔功
內省悖魄無從中謝竊念臣本以空疎誤承簡拔玷
從官而積歲尸榮祿以浮人凡最所更風猷茂樹曲
荷天私之覆靡尋官式之常超踐諫垣預聞宰政屬
兵農之並講當朝夕之勤咨徒竭陋愚無裨紀律力

窮猶駕眾知敗馭之傷物重過權始驗持衡之殆遭
時寬政勿汝深疵假淮國之一麾貿龍躔之再集皇
心念舊秘秩升華移守汶田坐豐周粟會于郊而陟
配嗟守土之恪居微藿翹誠孤匏擁歎敢謂伏蒙
尊號皇帝陛下回輿作作解舍爵推茲因勞臣功之
勤胥暨州藩之廣綸書恩賞皇驛馳音行多邑于舊
封倍榮祖于真實命成難拒思溢無涯矧籩豆駿奔
莫覩陪祀之盛而公卿奉引了無承乏之勞逮流慶

之叢臻亦覲顏而虛受忍慙云極度德奚堪惟餘頂
踵之微或効涓埃之報臣無任

謝南郊加恩表

宋公序

禮成陟配賞洽均禧優命聿頒兢心靡據臣誠感誠
懼頓首頓首竊念臣本惟寒士獲玷近班嚮自禁庭
舉參宰府斗筭受任尋貽不稱之譏天地地好生終
靡加誅之恐特由諫署出布藩條積媿盈顏樹聲寡
術屬陽交之大報罄率土以駿奔而臣越在守封舉

深存闕無攝事贊儀之幸有隳官去國之悲何圖拜
昨之辰亦沛明綰之典書勲八柱爰極于上階進戶
列候更陪于大邑寵章叢被悖魄九升此蓋伏遇
尊號皇帝陛下誕擁乾休洽敷人爵因雷風之大號
席簪履之餘恩洒濯深疵振除往咎謝生無所因推
不報之仁失旦思鳴或取自新之效大猷雖爾弱植
奚堪徒誓銜銘未知酬塞臣無任

謝南郊加恩表

王禹玉

奉二精之報方錯事于崇丘獵三靈之流遂均釐于
邇輔仰承嘉命俯惕孤衷伏念臣早會昌期進聞國
論器雖狹于所用志常勇于有為屬修郊廟之詞叨
預公卿之議鳴鐘在簾獲際靈旂之娛紆佩埽塗親
承天步之格曾乏秉文之助得觀繼聖之能逮敷錫
于鴻休復過膺于寵數論非朝允恩寔天隆茲蓋伏
遇 皇帝陛下文輯濶希仁漸疏逝因神推惠既被
蟲魚之豐為己掠功何勝淵谷之畏尚勉殫于朴守

期少謝于曲成

謝南郊加恩表

歐陽永叔

紫壇高峙式薦於精禋皇澤滂流推行于大慶祇膺
寵數伏切兢榮中謝伏惟 皇帝陛下出震膺期繼
文治百度講明於新政羣生涵泳於至和乃考舊章
聿思報本謂三歲一郊之禮必舉以時俾四海九州
並受其福遂因景至躬歛陽正萬國充庭其誰敢後
六卿聯事各以其官而臣職忝頒條位居守土執籩

豆而祇役罔獲施勞逮輝翟之餽餘遽蒙均惠無功
受賞莫遑俯偃之辭盡瘁事君惟誓糜捐之効

謝南郊加恩表

王介甫

解澤旁流明綸俯被永惟叨昧深以兢榮中謝竊以
時交正之承所以尊上帝疇官邑之賜所以富善人
盛福縻專至恩惟稱臣久塵要近上累明時方玉輅
之親祠以銅符而外守逮均休寵例獲褒加此蓋伏
遇 皇帝陛下以平施於萬方無遐遺之一物矧蒙

圖任之舊特荷獎知之深祇服訓辭敢忘報禮

謝南郊加恩表

蘇子由

元祀告成靈貺昭答推廣乾坤之施普霑臣子之私
顧惟何勞竊冒斯寵中謝伏惟 太皇太后陛下毋
儀三世坤載四方享天下之養而非以厚其身攬天
下之務而非以私其族培拊帝業保佑神孫譬如農
夫之養苗耘鋤以俟其長玉人之作器琢磨而萬其
成厲之以講學之勤示之以聽斷之敏導之事天而

天錫之福訓之祀地而地應以和凡下民所以知戴
吾君皆東朝有以啟迪其意如臣等輩絕企光塵雖
復因時以舉儀祇令以從事參備羽衛進執豆籩豈
有勞能坐被光寵此蓋伏遇 太皇太后陛下因賑
膳之餘慶錄左右之微功以謂承天之休不可以專
享及物之恩不嫌於過優致此誤恩首沾近列辭避
無所寢興莫遑

謝南郊加恩表

汪彥章

禮洽中天慶覃外服猥奉十行之詔就加五等之封
中謝伏念臣積冒恩私浸踰分願作設閑於異縣蒙
起發於偏城久客還家方憇南飛之鵠通侯授印忽
成左顧之龜雖滲漉以惟均何遭逢之獨異茲蓋伏
遇 皇帝陛下調御萬類藩飾羣工屬宣室之受釐
罄寰區而蒙福臣適臨本部仍昨鄉州宋人并潞以
得封望胡及此漢將銀黃而誇里榮乃過之寵既逮
於子孫忠敢移於生死

謝南郊加恩表

秦少游

宗祀以配上帝盛禮載陳大封而錫善人彛章具舉
寵靈誤逮媿懼交深中謝伏念臣學術本迂器能素
拙徒屬休明之盛獲參英俊之游發金匱石室之藏
討論何補承神州赤縣之乏瘼曠偶逃晚自喉舌之
司亟更管轄之任辱甄收之已過知報稱之尤難比
出近藩猶通秘籍會考我將之頌頃稽公玉之圖路
寢爰開總章斯寓涓季秋而積享肅群后以駿奔熙

事備成既盡情文之典湛恩汪穢遂周中外之臣曾
是孤蹤亦膺殊祉崇勲其進真食驟增奉綸詔以凌
兢仰雲天而隕越此蓋伏遇 皇帝陛下天仁丕冒
海德包涵尚記蠢愚嘗陪於國論更憐衰晚方守於
郡章俾異數之併加示純禧之均畀甘泉緬邈難望
屬車之塵清都邃嚴徒想鈞天之奏

謝明堂加恩表

晁无咎

祇帝合宮穆神休之如在施仁寓縣藹民氣以為春

預陪冕黻之嚴均被勲封之錫中謝伏念臣自參機

政寢歷歲時任重為憂寵至是戒高明日運徒知聖

德之不遲忠樸慮殫滋愧王功之無補逮總章之親

祀肅群辟之具來玉軼未馳雨先驅而警道黃流既

裸日純耀以排氛仰惟信順之所章此豈贊襄之可

及已告成於釐事肆大賚於寰中行食增封駢休沓

寵此蓋伏遇 皇帝陛下孝慈致治精祲格幽跡其

始基固可效天而法地推諸極致自當減五而登三

澤無一物之不加惠始近臣而下逮未知報禮祇有
捐軀

謝崇文總目加恩表

宋公序

竊念臣早以片文誤階榮牒序服星垣之職入陪鑾
禁之游凡在官司多塵總領爰屬仙瀛之藏廣收蠹
簡之遺度閣寢盈籤題罔辨特迂詔旨就擇就英俾
分討於藝文且精求於領目遠襲九流之別近尋四
庫之規通質舊章日程親課而臣首膺遷擢最留歲

時未終刊謬之功已忝參機之舉緹鉛清局別委子
俊僚山藪寬恩尋投於外服逮諸儒之卒業非孤臣
之預知比者伏蒙 皇帝陛下垂覽新書嘉聞善職
追念摩編之久靡遺尺寸之勤爰俾罔功亦膺蕃數
茂進文階之品真疏幹食之封媿集榮先獎浮願表
上中經之簿莫接於清班出內史之方何勝於渥訓
仰被燭幽之詔未知論報之階臨啟徘徊言因謝盡
臣無任

謝辭免加恩不允表

韓魏王

臣某言伏奉制命云云尋再具表陳讓蒙降批答不
允仍斷來章者登羣主而序昭穆甫畢親詞肆大青
而均福釐俄周率土忝被臣隣之列首膺優渥之恩
避讓弗俞省循無措中謝伏念臣性直而戇識暗且
踈徒知忠義以事君不顧險艱而效死危塗屢蹙鴻
造終全荐司樞莞之繁進領鈞衡之重聖主之責愚
相其可容誅倦令之治薄民烏能知化自須明黜免

累至公幸遇 皇帝陛下守位以仁奉先惟孝謂郊
而祀天地雖三載之躬行廟以合祖宗則歷朝之未
講此時思而舉墜屬閏祫之丁辰能饗休成霈澤滂
被惟是鼎槐之近特先綸綍之褒增唐閣之美名衍
漢封之多邑賞斯為誤義不容辭敢不祇奉國經勤
宣上德協心以濟朝得眾賢之和弼教於中福有庶
民之錫冀追素餐之責少裨旰食之勞臣無任云云

謝辭免登極加恩不允表

韓魏王

臣某言伏奉制命云云尋再具表陳讓蒙降批答不
允仍斷來章者睿聖膺圖肇覽八紘之緒幅員霈澤
交歡萬國之心眷惟丞輔之臣首玷便蕃之寵無容
避免徒極兢慙中謝竊以鸞省邇聯地亞珥貂之貴
天臺上列官推司馬之崇爰自近年空嘗兼拜如臣
者性惟甚戇學不能醅偶熙運之寢昌竊殊科而獲
仕孤忠自立眾毀交騰先皇帝察惟直之無他謂顯
愚之可任擢躋顯近力主單平奔走三垂有殉國忘

身之志周旋二府之佐王經遠之謀逮升冢席之榮
益起素餐之誚避賢奏牘方上印以輸誠喪考纏悲
忽攀髯而發慟伏遇 皇帝陛下丕承大統光紹慶
基盛德之新罄萬方而咸覩湛恩之降浹四海以無
垠故此弼臣特先異數俾正名於宰任復增重於官
儀乃遷公爵之優更益邑祖之厚俯僂之辭莫遂庸
駑之分何勝敢不謹極冰淵守堅金石良時易失惟
勤拙者之為高位疾顛常蹈古人之戒少裨至治上

答殊私臣無任云云

謝皇太后表

韓魏王

臣某言伏奉制命云云尋再具表陳讓蒙降批答不
允仍斷來章者龍德在天慶一人之纂極陽春市澤
浹四海以蒙休惟是弼臣首膺褒典辭甚堅而莫遂
躬屢省以無容中謝伏念臣早竊榮科寔偕膺士自
信鄙夫之守特知先帝之知外禦強垂五玷師權之
重入參樞筦再塵機務之繁逮進陟於冢司固取輕

於人望適露請藩之奏遽承憑几之言恭遇皇太
后殿下坤德居中母儀形外翊皇明而增煥協聖治
之有初爰霑大恩咸均庶位顧惟蒙陋前忝寵光峻
卿列於中臺正宰名於黃闈仍優封爵益厚食租令
如汗以靡收寵若驚而自失敢不任責歸己極誠在
公以道事君勉著經邦之效無功受祿終期上印之
歸臣無任云云

謝弟倚特賜進士第二等及第表

揚文公

臣某言臣親弟進士倚伏蒙聖慈特賜本科等二等
及第者恩出公朝慶深寒族感激之至抃蹈無從臣
某中謝伏念臣爰從幼歲即喪所天無負郭之田園
以供糊口有既孤之弟妹俱未成人世家漸墜於衣
纓旦暮將淪於溝壑臣是以激昂志節博涉藝文割
愛遊方出身事主自神宗之御極忝仙殿之讐書跡
遊君子之林月賦上農之祿爰歸故里親奉安輿盡
挈孤遺寓居輦轂臣弟適當幼稚早失義方春誦夏

弦再親加於教導羹藜含糗固均給於有無殆踰既
冠之年輒齒命鄉之荐春官較藝幸預奏名日吳臨
軒躬承明試方懼吹竽之濫敢希中鵠之榮 尊號
皇帝陛下簡在宸襟形于清問俯念司言之近列特
推延賞之深仁擢自羣倫寘于科級仍載頒于睿旨
更超踐于等夷側聽德音感深骨髓傳聞私室喜動
庭闈顧同氣之至親荷自天之殊澤榮過始望事出
非常內省微軀上銜厚施非土木之無識豈不知恩

顧龜蛇之甚微猶能報德誓匪躬而自効庶畢命以
為期臣無任云云

代宋狀元謝及第表

胡武平

太常試藝謬參藉奏之榮法坐第名濫塞言揚之選
沐清光之下濟仰華旦之親逢祇荷寵靈伏增欣懼

中謝

竊以羣材博舉鴻化肇先慎簡乃僚紀歷代之
寶訓譽髦斯士垂大雅之美談克樹秦室之基允為
盛德之集若乃右賢撫運左籥隆文率由上聖之姿

規恢前帝之憲伏惟 皇太后淵猷冠古景鑠在躬
軒曜儲靈有成湯之骨法坤儀納順茂太姒之音徽
鋪昭正始之風述宣中和之化而自鴻階紹建寶統
嗣興授玉几之顧遺財成樞務總金聲之條貫登翊
聖真率循豐茂之規迄用緝熙之典故得九清乃睠
萬寶由庚諸福之物並臻至治之隆胥洽靖共庶位
昭致群廉舉師俊之彛章下發中之溫詔旌文之命
相望於巖中物色之求駢臻於闕下申飭辨材之制

謹嚴飲墨之規輟邦直於中司簡朝英於上笏光昭
盛節委重斯文如臣等涉獵有年削摩無狀士卿充
賦偶承乏於計偕英毅須才固絕希於聖選撫空踈
而增惕備程品以奚堪豈謂宸造曲成睿思狎至褐
衣賜對局帝宇之凝嚴睿藻躬臨踈天姿之溫穆薦
登茂級獲寘榮塗錫再命之身章曳婁有煥頒十行
之言綽雅奧增華席鴻霈以寢深委賤質而奚報臣
等敢不慎修履素惕奉紳書慕漢吏之惟良副堯心

之在宥恪居官次益敦宿業之方懷畏簡書彌勵夕
冰之節少酬覆露共誓捐糜

謝狀元及第表代

汪彥章

襲慶璇源幸備維城之列陞榮桂籍俄先入彀之英
廣陸臚傳諸儒環視共欣千載之嘉會親值一人之
至公中謝嘗謂朝廷設科目以致英豪學者用文章
而收富貴故自布韋之士有終身鈎繫之間既登鴈
塔之標題至比龍門之變化豈有恩隆於帝胄更令

名玷於賢書班聯玉笋之華光動金枝之秀由聖德
曲成於小大視人材無間於親疎慮汨沒於膏梁特
甄陶於翰墨肆垂淵問猥及孱蹤仰漸聖化之深雖
能僅綴俯揆天資之陋終愧無奇甫上奏篇遽塵殊
等鵬擊天潢之浪鶯遷帝苑之春茲蓋伏遇 皇帝
陛下長育人材并包眾甫謂秦之士賤由先王教養
之哀方周以宗強宜近屬獎成之急儻不俯同於寒
俊孰為自致於亨衢昔慚假寵於分茅今喜成名於

拾芥繫君父義方之素致邦家儒術之尊臣敢不敦
尚詩書勉思忠孝既與在廷之多士同值文興將令
就傳之百男悉從媿始

謝狀元及第表

君門九重入奉臨軒之問愚者千慮誤叨絕等之恩
非臣疎愚所克負荷中謝伏念臣才質迂下學問空
虛驟起草萊不識朝廷之忌諱輕獻狂瞽蓋本忠義
之激昂敢期一日之間辱在多士之首此蓋伏遇

皇帝陛下文武天縱輝光日新方恢中興之功不求
匹夫之脩謂臣言語之雖拙察臣志趣之非邪特卑
殊科以主正論臣敢不洗濯素志益勵前修恩重丘
山敢自榮而僥倖身輕絲髮寧有憚於糜捐

謝賜弟安國及第表

王介甫

雋乂之求外覃草野龍光之施首逮門庭中謝竊以
躬國論聽斷之煩而察知孤遠之行略門資貢舉之
法而拔取滯淹之才山林之所誦說而難遭閭巷之

所驚嗟而罕見伏惟 皇帝陛下協德穹昊比明義
和溥臨四方洞照萬物如臣同產為世畸人少遭閔
凶自奮寒苦雖力行強學粗有時名而少偶寡徒機
絕榮望豈期聖聽俯及幽潛遂使窮途坐階華寵獎
以詔書而試藝賜之科第而命官祿不逮親既永乖
於餐志仕非為己當共誓於捐軀

代嘉王謝及第表

汪彥章

襲慶璇源幸脩維城之列階榮桂籍俄先入彀之英

廣脩臚傳諸儒園視共欣千載之嘉會親值一人之
至公臣嘗謂朝廷設科目以致英豪學者用文章而
守富貴故自布韋之士有終身鈇槩之間既登鴈塔
之標題至比龍門之變化豈有恩隆于帝胄更令名
玷有賢書班聯玉笋之華光動金枝之秀由聖德曲
成于小大視人材無間於親疎慮汨沒於膏梁特甄
陶於翰墨肆垂淵問猥及孱蹤仰漸聖化之深雖能
僅綴俯揆天資之陋終愧無奇甫上奏篇遽陳殊等

鵬擊天潢之浪鶯遷帝苑之春茲蓋伏遇 皇帝陛
下長育祥材并包眾甫謂秦之士賤由先王教養之
衰方周以宗疆宜近屬獎成之急儻不俯同於寒畯
孰謂自致於亨衢昔慙假寵于分茅今喜成名於拾
芥繫君父義方之素致邦家儒術之尊某敢不敦尚
詩書勉思忠孝既與在廷之多士同值文興將令就
傳之百男悉從媿始

乾道壬辰進士賜第謝太上皇帝表

陳君舉

疎愚之對爰契九重聲教所陶聿來三紀推本功德
度越古今中謝竊跡本朝家法之詳究觀列聖心傳
之要規模一以經術事業付之諸生 皇帝陛下所
以載纘大猷曲垂清問臣等顧遭逢之幸甚而循省
之缺然其何稱塞招延之休徒以生長涵養之澤茲
蓋伏遇 大上皇帝陛下道久忘世仁深入人光照
斯文燕及今日退藏于密資萬物于乾元長發其祥

生多士于王國臣等敢不益堅精白茂對龍光言念

何由庶幾無斁

士將

無負虞舜聰明

之朝遐不作人其敢忘周王壽考之賜

謝弟安國得館職表

王介甫

書林置職方儲高位之材詔版推恩遂假私門之寵
在於疵賤實以兢慙中謝伏念臣初起孤生非謀膺
仕中參近侍特荷先朝屬憂患之相仍分湮淪而自
棄敢圖收召俯暨幽潛服在臣鄰驟冠論思之列恩

加子弟具膺慶賞之延有冒昧於殊私或起踰於常
法惟數竒之同產嘗久困於稠人第切西垣比前叨
於睿獎校文東觀更曲被於明揚此蓋伏遇 皇帝
陛下與善無方使能以類欲阜成於大治務博取於
眾材遂忘形跡之憂以溥龍光之施哀宗既亢惟知
上報之難小已易盈彌懼先顛之疾

謝弟禹圭授試銜表

王禹偁

臣某言臣禹圭昨差押本州賀登寶位進奉伏蒙聖
慈特授將郎試秘書省校書郎者千年遭遇九族輝

榮

中謝

伏念臣出自孤貧猥叨班列雖累居近侍而

未免食貧言念禹圭臣之母弟素無文性早使專經
重以先臣惜其幼子本期擢第以慰慈顏自後應舉
六年丁憂三載漸其強仕未有出身今者伏遇 皇
帝陛下纘嗣寶圖誕敷文德凡居守土之任義合駿
奔因命在原之親入脩職貢伏蒙 陛下舉先朝之
故事推出震之殊恩俾列官常仍居讐校起家之調

曲荷於生成報國之心同期於死所伏限郡印不獲
蹈舞玉階臣無任感天荷聖激切屏營之至謹奉表
以聞

謝封贈表

張乖崖

臣某言進奏院遞到官告三通臣亡父某蒙恩贈太
常卿亡母謝氏追封新昌郡太夫人妻王氏進封太
原郡夫人者雲雷重施存歿沾恩榮忝過常喜愧交
集中謝臣聞綏和人紀允屬於君臨振舉家聲用光

于子道非遇昌平之運克隆敦勸之風則何由變單
門為華宗登朽骨於名路恭惟 皇帝陛下仁明濟
代孝愛動天四氣均和萬方熙穆然後脩墜典禮百
神議法從寬惟民之恤衝衝列辟仰慶賜以榮家眇
眇舊官咸賞延於繼絕昭然大賚邈矣難名竊念臣
識昧知微學慚博古遇八表來王之日用人處多當
九重選吏之時出身特異致使 于官秩寔暉映于
鄉閭所幸者厚入俸金嘗豐饒于甘脆所喜者重加

贈典復光揚於令名既彰為孝之心未有資忠之要
臣不得不強扶衰病益勵廉勤宣聖化於平民俾其
遂性示皇威於醜類望至悛心少寬南顧之憂以達
事君之節云云

謝太師加贈表

張敬夫

日月昭回燭孤忠於既沒風雷鼓動詔卹典於無窮
藐然惟孤重以隕涕中謝伏念先臣早趨列著即值
多艱痛陵廟之莫扶嘆簪紳之自保以為寇讎若此

豈臣子之遑安義理所存何利害之足計會真人之
勃起先百辟以駿奔奉命於危機洶湧之秋投軀於
眾難紛紜之際以至進登揆路盡護戎車不憂醜虜
之方張惟懼人心之不正炳若丹青之誓率茲縞素
之師雖蒙神聖之深知亦致姦邪之橫病擯屈炎服
中逾二紀之更敢意餘齡復際重明之運竊窺睿蘊
思復祖疆願畢効於精誠冀平清於氛祲而割地奉
讎之論起合黨禘交之謀深修邊備則指為費財講

武功則目為生事妄擬偷安於歲月曾微却顧於興
衰非惟沮先臣之為實乃傷陛下之志鑠金成市卒
賴保全易箒餘哀空存感慨悵歷時之寢久忽當愧
以興施中旨顯放褒章具舉既極上公之貴復稽節
惠之文人知忠義之榮莫不兢勸士喜是非之定少
緩私憂固將垂訓於邦家豈但增光於泉壤此蓋伏
遇 皇帝陛下勤儉法禹聰明繼堯緯武經文不慙
於宗祏彰善癉惡允若於天心敷揚舊勲表厲在

服誦溫言之曲盡仰至意之旁乎臣猥以承家極茲
追慕奉牲以告知神理之來歆聚族而謀念上恩之
曷報惟慕先臣之許國力圖後日之殞身

謝任子表代魏王

呂伯恭

列第環宮方極奉承之樂周廬設衛載延似續之榮
烏奕觀瞻凌兢佩戴竊以東平諸子印猶限於能趨
魯國五名類僅稱於同物疇若覃厯恩襁祿矧惟錫
美稱於冕旒此蓋伏遇 皇帝陛下高視穆清游心

昭曠巍巍蕩蕩共瞻太極之尊繼繼承承爰篤曾孫
之慶願訓成於幼學用克對於鴻私

謝任子表代

溫清承顏慈極夙成於椒屋焜煌發命光風初轉於
蘭芽吉語甫傳微躬載惕竊以元氣兩儀之運資始
資生天枝四葉之祥以嗣以續慶流繁衍爵及携持
此蓋伏遇 壽聖太上皇后殿下德冠河洲化孚宮
閭周邦胥喜惠既篤於曾孫晉錫用蕃福本承於王

母願益聞於蒙昧庶仰答於坤元

謝任子表

宋子京

聖澤下頒詔給有渙慶叢閭闈光動里閭中謝伏念
臣退跡熒熒餘年種種尚叨儲傅之秩許懷家巷之
安養且有仁德將焉謝近緣誕聖之節更陳延賞之
求伏蒙 皇帝陛下大度包荒至慈及物甫從人欲
即霈臺恩孝治方隆許及宗親之末衰容無狀更流
枝葉之榮揣分既逾靡軀曷報

聖宋名賢五
百家播芳大全
文粹卷三十二
終

